

明心寶鑑全



三百一十四  
十  
二  
五  
十  
六  
七



明心寶鑑序

明心寶鑑者何為而作也

古之人憂後學之徇利忘

義而作也蓋人之生有天

命之性有氣質之性天命



之性則道心之謂也氣質  
之性則人心之謂也道心  
者仁義禮智性命之正人  
心者知覺運動形氣之私  
行其正則不求利而自無



不利徇其私則求利未得  
而害已隨之然人心惟危  
道心惟微必察於二者之  
間而惟精惟一使惻隱羞  
惡辭讓是非之心擴克而



為一身之主口鼻耳目四  
肢百體之欲禁止而每聽  
命於己則危者安微者著  
而本心之明無所不明矣  
是以中庸之率性大學之



明德皆此意也。今看是書  
其所言雜引諸儒之說文  
理語脉不似庸學之貫通  
相接。然其所以為教者又  
皆本之天命。所賦渾然之



理不待求之民生日用彝  
倫之外節節提撕句句警  
覺使人去惡而就善遵義  
而忘利此篇之作豈偶然  
哉今有人把鑑照身見其



容貌之不正則必知其惡  
而正之者矣看此一篇反  
求諸身耐省心修己亦如  
窺鑑照面知所以改其容  
則庶乎其得此名篇之義



而不失其本心之正矣

嘉靖庚戌三月念浚德水

李珥字叔獻謹序

高麗藝文館提學門下侍

中文憲公秋露堂神道碑



我

哲宗朝春官大宗伯申公

錫愚序而銘之申公博聞

多識人也故言耳目所未

逮前代六百年事頗詳孔



子所謂文獻足則能徵之  
矣者歟其文曰先生諱適  
字慣中以秋溪為籍性豁  
達無檢束學問則曰受學  
于竹溪先生安裕又曰櫟



翁李齊賢曰安文成公尊  
國學修庠序舉李晟秋適  
崔元冲等一經置兩教授  
於是縫掖薦紳之徒多以  
通經學古為事此其大槩



也其書有明心寶鑑一卷  
為目凡十九一曰繼善二  
曰天命三曰順命四曰孝  
行五曰正己六曰安分七  
曰存心八曰戒性九曰勤



學十曰訓子十一曰省心  
十二曰立教十三曰治政  
十四曰治家十五曰安義  
十六曰遵禮十七曰言語  
十八曰交友十九曰婦行



蓋其為書述而不作摭摭  
經傳及百氏之言壹是皆  
以吾人日用常行之道為  
本而大學之修齊治平亦  
不外乎是豈不是儒教之



羽翼也哉忠肅王世已立  
祠於平安道龍川府號為  
瞻學齋揭影而宴享焉賢  
人之廟食百世不亦宜乎  
惜乎後孫之久不振也今



其苗裔之居達城者世文  
鶴九基豐夏暑雨數百里  
而來徵弁卷之文固辭而  
固請嘉其起遠之誠謹按  
其家乘而序之



聖上御極之三年丙寅五

月小暑節通政大夫行金

海都護府使孔巖許傳謹

序

是書皆古人格言茶飯裘



葛多於行處用力而曰明  
心何也心為一身主宰不  
明乎心行不著習不察此  
書之所以名也心體本明  
而物交則昏故晦翁詩取



媿於鑑塘之清鑑之空在  
我方寸反省而磨治焉則  
書中所載無非明心之要  
也 秋文憲公當麗代荒  
庵之辰能自明於心以心



為師于以勗賢館而崇儒  
教述而不作以遺後人其  
視寄耳目而騰口舌者不  
其賢歟其裔孫將登諸梓  
請余讎教余覽之歛衽曰



言行一致而今人尚言古  
人尚行此書之有補於世  
不尠遂略叙數語于後篇  
目類例有許性齋序不復  
贅



崇禎後五戊辰仲春晚歸

山人凝窩李源祚謹書

華陽夫子之訓曰祖先有

義為其子孫者不能褒歆

則不仁甚矣噫露堂秋公



以麗季理學之宗被薦於  
文成安公重建文廟斯  
文賴而不墜竟做理學之  
宗主矣脚下諸孫未知為  
幾人而只有世文閣永甫



終始獨賢記功宗於百世  
之祀勑俎豆於一區之享  
陽秋大義單傳密付即其  
家法講以明之 皇壇拜  
班特荷同叅之異數紹述



之美至矣盡矣  
朝家之  
崇報更無餘蘊而其先後  
之誠力從可以知之矣第  
其兵燹之餘文獻無徵只  
有寶鑑一弓雖是零金片



羽即天地間有數之文字  
也點而不章庸是瞿之行  
將剖剝俾圖垂後之方其  
世譜也家乘也次第歷舉  
文憲公昭々之靈必曰我



有後焉蘇家所謂仁厚之  
風始見於今日曷不休哉  
老閣鈇槩亦已多年而終  
不敢辭者只以托名為榮  
不揆汰哉之嫌以塞鄭重



之責云爾

戊辰棗秋之上澣通政大

夫前行敦寧都正嘉林趙

基升謹序

居士有鏡在躬其體本清



明塵垢侵蝕漸昏如日月  
之翳雲常患不炤物又無  
所取清日以清水濯之淨  
紙拭之鏡體之明復其本  
然炤物取清依舊是未塵



時鏡也於是知塵蝕其外  
未喪其明也歎曰人之於  
心亦猶此鏡苟使吾人有  
能於氣稟所拘人欲所蔽  
之中知吾德之本明而將



前哲嘉言善行隨處警心  
以明之不使不善之心萌  
作於膏裏雖不能以大有  
充拓以盡明其明德其心  
則故是一段明善人况大



充拓者光明為如何哉上  
年余見人案冊有明心寶  
鑑者竊意其篇目類非閒  
雜書閱過所輯錄無非古  
聖賢勸懲人至論而分類



成書者也愛好而借歸俾  
善寫者傳謄為家莊計恨  
未識編輯人名氏比達南  
秋君世文奉是書來請弁  
始知為露堂文憲公手輯



也不覺上之手而心開眼  
明噫露翁挺麗俗之陋達  
文廟之宗者其有以也當  
此之時不有躬行心得之  
妙其孰能排時君所尊之



竺教脫通國所尚之武事  
而一洗詞華之謬倡明心  
性之學以立百代之言乎  
由此焉圃翁起而我朝  
五百年名賢真儒後先輩



出性理之說大明中天者  
其不之權輿於此乎鏡空  
心虛不治則昏治之則明  
苟能志於斯大學明明德  
之原說在矣今古儒賢之



發明備矣是書也亦足為  
輿衛於集註若衍義矣世  
文乎其鑑于是書而明乎  
己心夫然則露翁之心其  
庶幾復明於百世而露翁



之後亦將自此而昌大矣  
余斯拱而竢之耳

上之五年戊辰重陽前一

日通訓大夫前行公忠道

都事豐山柳疇睦謹序



明心寶鑑凡例

一露堂先生袁葺詔後學之書獨賴此篇之存而世遠板刻多有訛誤故攷正鋟梓

一篇內所引只就賢聖格言短章取義故以隨錄先後不以世代次序

一命篇次第似有異於八條先後而此非循序用工之書只是隨處示戒之言故仍舊編錄一異家子流列於篇中者雖無害於聖人擇言之道而至於衛正之義不可不嚴故更加校

正首先聖訓



一李文成公所纂序與跋得於并首傳謄而其  
叅互於庸學天人之訓最爲開卷第一義庸  
備後學勸勉

明心寶鑑凡例終



明心寶鑑篇目

序五

繼善篇

天命篇

順命篇

孝行篇

正己篇

安分篇

存心篇

戒性篇



勤學篇

訓子篇

省心篇

立教篇

治政篇

治家篇

安義篇

遵禮篇

言語篇

交友篇



婦行篇

跋四



明心寶鑑篇目終



明心寶鑑

繼善篇

子曰爲善者天報之以福爲不善者天報之以禍

子曰見善如不及見不善如探湯

漢昭烈將終勅後主曰勿以惡小而爲之勿以善小而不爲

太公曰見善如渴聞惡如聾

太公曰善事須貧惡事莫樂

司馬溫公曰積金以遺子孫未必子孫能盡守



積書以遺子孫未必子孫能盡讀不如積陰德  
於冥冥之中以爲子孫之計也

莊子曰一日不念善諸惡皆自起

莊子曰於我善者我亦善之於我惡者我亦善  
之我既於人無惡人能於我無善哉

馬援曰終身行善善猶不足一日行惡惡自有  
餘

景行錄曰恩義廣施人生何處不相逢讎言冤莫  
結路逢挾處難回避

東嶽聖帝垂訓曰一日行善福雖未至禍自遠



矣一日行惡禍雖未至福自遠矣行善之人如春園之草不見其長日有所增行惡之人如磨刀之石不見其損日有所虧

天命篇

子曰順天者存逆天者亡

子曰獲罪於天無所禱也

康節邵先生曰天聽寂無音蒼蒼何處尋非高亦非遠都只在人心

玄帝垂訓曰人間私語天聽若雷暗室欺心神目如電



益智書云惡罐若滿天必誅之

莊子曰若人作不善得顯名者人雖不害天必戮之

○種瓜得瓜種豆得豆天網恢恢疎而不漏

順命篇

子曰苑生有命富貴在天

○萬事分已定浮生空自忙

景行錄云禍不可倖免福不可再求

○時來風送滕王閣運退雷轟薦福碑

列子曰癡聾痼瘂家豪富智慧聰明却受貧年



月日時該載定筭來由命不由人

孝行篇

詩曰父兮生我母兮鞠我哀哀父母生我劬勞  
欲報之德昊天罔極

子曰孝子之事親也居則致其敬養則致其樂  
病則致其憂喪則致其哀祭則致其嚴

子曰父母在不遠遊遊必有方

太公曰孝於親子亦孝之身既不孝子何孝焉  
○孝順還生存順子五逆還生五逆兒不信但  
看簷頭水點點滴滴不差移



正己篇

子曰君子有三戒少之時血氣未定戒之在色  
及其壯也血氣方剛戒之在鬥及其老也血氣  
既衰戒之在得

子曰衆好之必察焉衆惡之必察焉

○酒中不語真君子財上分明是丈夫

○萬事後寬其福自厚

宰予晝寢子曰朽木不可雕也糞土之牆不可  
鈣也

太公曰勿以貴己而賤人勿以自大而蔑小勿



以恃勇而輕敵

太公曰勤爲無價之寶慎是護身之符

太公曰瓜田不納履李下不整冠

太公曰欲量他人先須自量傷人之語還是自傷含血噴人先污其口

○凡戲無益惟勤有功

康節邵先生曰聞人言人之謫未嘗怒聞人言人之譽未嘗喜聞人言人之惡未嘗和聞人言人之善則就而和之又從而喜之其詩曰樂見善人樂聞善事樂道善言樂行善意聞人之惡



如負芒刺聞人之善如佩蘭蕙

○道吾善者是吾賊道吾惡者是吾師

性理書云見人之善而尋己之善見人之惡而尋己之惡如此方是有益

近思錄云懲忿如救火窒慾如防水

景行錄云大丈夫當容人無爲人所容

景行錄云保生者寡慾保身者避名無慾易無名難

景行錄曰食淡精神爽心清夢寐安

景行錄曰心可逸形不可不勞道可樂身不可



不憂形不勞則怠惰易弊身不憂則荒淫不定  
故逸生於勞而常休樂生於憂而無厭逸樂者  
憂勞其可忘乎

○定心應物雖不讀書可以爲有德君子

○耳不聞人之非目不視人之短口不言人之  
過庶幾君子

蔡伯諧曰喜怒在心言出於口不可不慎

馬援曰聞人過失如聞父母之名耳可得聞口  
不可得言也

荀子曰無用之辯不急之察棄而勿治



孫真人養生銘曰怒甚偏傷氣思多太損神神  
疲心易役氣弱病相因勿使悲歡極當令飲食  
均再三防夜醉第一戒晨嘔

紫虛元君誠諭心文曰福生於清儉德生於卑  
退道生於安靜命生於和暢患生於多慾禍生  
於多貪過生於輕慢罪生於不仁戒眼莫看他  
非戒口莫談他短戒心莫出貪嗔戒身莫隨惡  
伴無益之言莫妄說不干己事莫妄爲尊君王  
孝父母敬尊長奉有德別賢愚恕無識物順來  
而勿拒物旣去而勿追身未遇而勿望事已過



而勿患聰明多暗昧筭計失便宜損人終自失  
倚勢禍相隨戒之在心守之在氣爲不節而公  
家因不廉而失位勸君自警於平生可歎可驚  
而可畏上臨之以天鑑下察之以地祗明有王  
法相繼暗有鬼神相隨惟正可守心不可欺戒  
之戒之

夷堅志云避色如避讐避風如避箭莫喫空心  
茶少食中夜飯

安分篇

子曰不在其位不謀其政



景行錄云知足可樂務貧可憂

○知足者貧賤亦樂知足者富貴亦憂

○知足常足終身不辱知止常止終身無恥

擊壤詩云安分身無辱知機心自閒雖居人世  
上却是出人間

語云房室不在高大不漏便好衣服不在綾羅  
和暖便好飲食不在珍羞飽腹便好娶妻不在  
顏色賢淑便好親戚不在新舊來往便好隣里  
不在高低和睦便好朋友不在酒食扶持便好

存心篇



子曰聰明愚魯守之以愚功被天下守之以讓  
勇力振世守之以恟富有四海守之以謙

○百巧百成不如一拙

范忠宣公戒子弟曰人雖至愚責人則明雖有  
聰明恕己則昏爾曹但當以責人之心責己恕  
己之心恕人則不患不到聖賢地位也

朱文公曰守口如瓶防意如城

○心不負人面無慚色

○人無百歲人枉作千年計

寇萊公六悔銘曰官行私曲失時悔富不儉用



貧時悔藝不少學過時悔見事不學用時悔醉  
後狂言醒時悔安不將息病時悔

孫思邈曰膽欲大而心欲小智欲圓而行欲方  
○念念要如臨戰日心心常似過橋時

○惧法朝朝樂欺公日日憂

素書云薄施厚望者不報貴而忘賤者不久

○施恩勿求報與人勿追悔

景行錄云坐密室如通衢馭寸心如六馬可免  
過

景行錄云責人者不全交自恕者不改過



○夙興夜寢所思忠孝者人雖不知天必知之  
飽食暖衣怡然自衛者身雖安其如子孫何

○以愛妻子之心事親則曲盡其孝以保富貴  
之心奉君則無往不忠以責人之心責己則寡  
過以恕己之心恕人則全交

○爾謀不臧悔之何及爾見不長教之何益利  
心專則背道私意確則滅公

○生事事生省事事省

擊壤詩云富貴如將智力求仲尼年少合封侯  
世人不解青天意空使身心半夜愁



益智書云寧無事而家貧貧有事而家富富寧無事而住茅屋不有事而住金屋寧無病而食麤飯不有病而食良藥

○心安茅屋穩性定菜羹香

戒性篇

家語云危其身者好發人之惡

○紉蘭握瑾者誨妬之良謀也要肆利孔者招怨之危機也宏談硬論者騰謗之健駟也方人擬物者反刺之銛刃也

子張欲行辭於夫子願賜一言爲修身之美夫



子曰百行之本忍之爲上子張曰何爲忍之夫子曰天子忍之國無害諸侯忍之成其大官吏忍之進其位兄弟忍之家富貴夫妻忍之終其世朋友忍之名不廢自身忍之無患禍子張曰不忍如何夫子曰天子不忍國空虛諸侯不忍喪其軀官吏不忍刑法誅兄弟不忍各分居夫妻不忍令子孤朋友不忍情意踈自身不忍患不除子張曰善哉善哉難忍難忍非人不忍不忍非人

景行錄云人性如水水一傾則不可復性一縱



則不可反制水者必以隄防制性者必以禮法  
景行錄云屈己者能處重好勝者必遇敵  
○忍一時之氣免百日之憂

○得忍且忍得戒且戒不忍不戒小事成大

○愚濁生嗔怒皆因理不通休添心上火只作  
耳邊風長短家家有炎涼處處同是非無實相  
究竟揔成空

○惡人罵善人善人揔不對不對心清淨罵者  
口熱沸正如人唾天還從己身墜

○我若被人罵佯聾不分說譬如火燒空不救



自然滅我心等虛空揔爾反唇舌

○凡事畱人情後來好相見

### 勤學篇

子曰博學而篤志切問而近思仁在其中矣

論語曰學如不及惟恐失之

徽宗皇帝曰學者如禾如稻不學者如蒿如草如禾如稻兮國之精糧世之大寶如蒿如草兮耕者憎嫌鋤者煩惱他日面墻悔之已老

朱文公曰家若貧不可因貧而廢學家若富不可恃富而怠學貧若勤學可以立身富若勤學



名乃光榮惟見學者顯達不見學者無成學者  
乃身之寶學者乃世之珍是故學則爲君子不  
學則爲小人後之學者宜各勉之

韓文公曰人不通古今馬牛而襟裾

莊子曰人之不學若登天而無術學而智遠如  
披祥雲而覩青天登高山而望四海

禮記云玉不琢不成器人不學不知義

太公曰人生不學如冥冥夜行

訓子篇

太公曰男子失教長必頑愚女子失教長必麤



踈

○男年長大莫習樂酒女年長大莫令遊走

○嚴父出孝子嚴母出孝女

○憐兒多與棒憎兒多與食

○人皆愛珠玉我愛子孫賢

呂榮公曰內無賢父兄外無嚴師友而能有成者鮮矣

莊子曰事雖小不作不成子雖賢不教不明

漢書云黃金滿筮甌不如教子一經賜子千金不如教子一藝



○至樂莫如讀書至要莫如教子

景行錄云賓客不來門戶俗詩書無教子孫愚

省心篇

子曰不觀高崖何以知顛墜之患不臨深淵何以知沒溺之患不觀巨海何以知風波之患

子曰明鏡所以察形往古所以知今

子曰士志於道而恥惡衣惡食者未足與議也

子曰木從繩則直后從諫則聖

○欲知未來先察已然

○過去事明如鏡未來事暗似漆



○一派青山景色幽前人田土後人收後人收得莫歡喜更有收人在後頭

家語云水至清則無魚人至察則無徒

真宗皇帝御製曰知危識險終無羅網之門舉善薦賢自有安身之路施仁布德乃世代之榮昌懷妬報冤與子孫之爲患損人利己終無顯達雲仍害衆成家豈有久長富貴改名異體皆因巧語而生禍起傷身蓋是不仁之召

神宗皇帝御製曰遠非道之財戒過度之酒居必擇隣交必擇友嫉妬勿起於心讒言勿宣於



口骨肉貧者莫踈他人富者莫厚克己以勤儉  
爲先愛衆以謙和爲首常思已往之非每念未  
來之咎若依朕之斯言治家國而可久

高宗皇帝御製曰一星之火能燒萬頃之薪半  
句非言誤損平生之德身被一縷常思織女之  
勞日食三餐每念農夫之苦苟貪妬損終無十  
載安康積善存人必有榮華後裔福緣善慶多  
因積行而生八聖超凡盡是真實而得  
太公曰凡人不可逆相海水不可斗量  
太公曰日月雖明不照覆盆之下刀劍雖快不



斬無罪之人非灾橫禍不入慎家之門

太公曰良田萬頃不如薄藝隨身

濂溪先生曰巧者言拙者默巧者勞拙者逸巧者賤拙者德巧者凶拙者吉嗚呼天下拙刑政撤上安下順風清弊絕

康節邵先生曰閒居慎勿說無妨纔說無妨便有妨爽口物多終作疾悵心事過必爲殃與其病後能服藥不若病前能自防

康節邵先生曰有人來問卜如何是禍福我虧人是禍人虧我是福



○大厦千間夜卧八尺良田萬頃日食二升  
○久住令人賤頻來親也踈但看三五日相見  
不如初

○渴時一滴如甘露醉後添盃不如無

○酒不醉人人自醉色不迷人自迷

○公心若此私心何事不辦道念若同情念成  
德多時

擊壤詩云平生不作皺眉事世上應無切齒人  
大名豈在鐫頑石路上行人人口勝碑

○有麝自然香何必當風立



○有福莫享盡福盡身貧窮有勢莫使盡勢盡  
冤相逢福兮常自惜勢兮常自恭人生驕與侈  
有始多無終

王叅政四畱銘曰畱有餘不盡之巧以還造物  
畱有餘不盡之祿以還朝廷畱有餘不盡之財  
以還百姓畱有餘不盡之福以還子孫

○黃金千兩未爲貴得人一語勝千金

○巧者拙之奴

○小船難堪重載深逕不宜獨行

○黃金未是貴安樂直錢多



之材成水有所養則泉源壯而流派長灌溉之  
利博人有所養則志氣大而識見明忠義之士  
出可不養哉

景行錄云結怨在人謂之種禍捨善不爲謂之  
自賊

景行錄云大丈夫見善明故重名節於泰山用  
心剛故輕死生於鴻毛

○家和貧也好不義富如何但存一子孝何用  
子孫多

○父不憂心因子孝夫不煩惱是妻賢言多語



失皆因酒義斷親疎只爲錢

○既取非常樂頂防不測憂

○得寵忽辱居安慮危

○榮輕辱淺利重害深

○甚愛必甚費甚譽必甚毀甚喜必甚憂甚賊

必甚公

○天有不測風雨人有朝夕禍福

○未歸三尺土難保百年身已歸三尺土難保

百年墳

○自信者人亦信之吳越皆兄弟自疑者人亦



疑之身外皆敵國

○疑人莫用用人莫疑

○若聽一面說便見相離別

○飽煖思淫欲飢寒發道心

○悶人之凶樂人之善濟人之急救人之危

○經目之事猶恐未真背後之言豈足深信

○不恨自家蒲繩短只恨他家苦井深

○賊濫滿天下罪拘薄福人

○天若改常不風卽雨人若改常不病卽死

史記曰郊天禮廟非酒不享君臣朋友非酒不



義鬪爭相和非酒不勸故酒有成敗而不可泛  
飲之


○自作還自受

性理書云接物之要己所不欲勿施於人行有  
不得反求諸己

○酒色財氣四堵牆多少賢愚在內廂若有世  
人跳得出便是神仙不死方

諷諫云水底魚天邊鴈高可射兮低可釣惟有  
人心咫尺間咫尺人心不可料

○畫虎畫皮難畫骨知人知面不知心





○對面共語心隔千山

○海枯終見底人死不知心

梓潼帝君垂訓曰妙藥難醫冤債病橫財不富  
命窮人生事事生君莫怨害人人害汝休嗔天  
地自然皆有報遠在兒孫近在身

○花落花開還又落錦衣布衣更換着豪家未  
必常富貴貧家未必長寂寞扶人未必上青霄  
推人未必墮丘壑勸君凡事莫怨天天意於人  
無厚薄

○堪歎人心毒似蛇誰知天眼轉如車去年公受



取東隣物今日還歸止舍家無義錢財湯潑雪  
儻來田地水推沙若將狡譎爲生計恰似朝開  
暮落花

○無藥可醫卿相壽有錢難買子孫賢

○一日清閒一日仙

說苑曰官怠於官成病加於小愈禍生於懈惰  
孝衰於妻子察此四者慎終如始

○器滿則溢人滿則喪

○羊羹雖美衆口難調

○尺璧非寶寸陰是競



壯元詩云國正天心順官清民自安妻賢夫禍  
少子孝父心寬

益智書云白玉投於泥不能汚涅其色君子行  
於濁地不能染亂其心故松柏可以耐雪霜明  
智可以涉難危

○八山擒虎易開口告人難

○遠水不救近火遠親不如近隣

疏廣曰賢而多財損其志愚而多財益其過

○人貧智短福至心靈

○不經一事不長一智



○是非終日有不聽自然無

○來說是非者便是是非人

### 立教篇

武王問太公曰人居世上何得貴賤貧富不等  
願聞說之欲知是矣太公曰富貴如聖人之德  
皆由天命富者用之有節不富者家有十盜武  
王曰何爲十盜太公曰時熟不收爲一盜收積  
不了爲二盜無事燃燈寢睡爲三盜慵懶不耕  
爲四盜不施功力爲五盜專行切害爲六盜養  
女太多爲七盜晝眠懶起爲八盜貪酒嗜慾爲



九盜強行嫉妬爲十盜武王曰家無十盜不富者何如太公曰人家必有三耗武王曰何名三耗太公曰倉庫漏濫不蓋鼠雀亂食爲一耗收穫失時爲二耗拋撒米穀穢賤爲三耗武王曰家無三耗不富者何如太公曰人家必有一錯二悞三癡四失五逆六不祥七奴八賤九愚十強自招其禍非天降殃武王曰願悉聞之太公曰養男不教訓爲一錯嬰孩勿訓爲二悞初逆新婦不行嚴訓爲三癡末語先笑爲四失不養父母爲五逆夜起赤身爲六不祥好挽他弓爲



七奴愛騎他馬爲八賤喫他酒勸他人爲九愚  
喫他飯命朋友爲十強武王曰甚美誠哉是言  
也

孔子三計圖云一生之計在於勤一年之計在  
於春一日之計在於寅幼而不學老無所知春  
若不耕秋無所望寅若不起日無所辨

子曰立身有義而孝爲本喪祀有義而哀爲本  
戰陣有烈而勇爲本治政有理而農爲本居國  
有道而嗣爲本生財有時而力爲本  
王蠋曰忠臣不事二君烈女不更二夫



忠子曰治官莫若平臨財莫若廉

張惠叔座右銘曰凡語必忠信凡行必篤敬飲  
食必慎節字畫必楷正容貌必端莊衣冠必肅  
整步履必安詳居處必正靜作事必謀始出言  
必顧行常德必固持然諾必重應見善如己出  
見惡如己病凡此十四者皆我未深省書此當  
座右朝夕視爲警言

范益謙座右銘曰一不言朝廷利害邊報差除  
二不言州縣官員長短得失三不言衆人所作  
過惡之事四不言仕進官職趨時附勢五不言



財利多少。厭貧求富。六不言。淫媒戲慢。評論女  
色。七不言。求覓人物。干索酒食。又人附書信。不  
可開圻。沉滯與人並坐。不可窺人私書。凡八人  
家。不可看人文字。凡借人物。不可損壞。不還。凡  
喫飲食。不可揀擇。去取與人同處。不可自擇便  
利。凡人富貴。不可歎羨。詆毀。凡此數事。有犯之  
者。足以見用意之不肖。於存心修身。大有所害。  
因書以自警言。

性理書云。五教之目。父子有親。君臣有義。夫婦  
有別。長幼有序。朋友有信。



景行錄云爲政之要曰公與清成家之道曰儉與勤

○讀書起家之本循理保家之本勤儉治家之本和順齊家之本

治政篇

唐太宗御製曰上有麾之中有乘之下有附之幣帛衣之倉廩食之爾捧爾祿民膏民脂下民易虐上蒼難欺

明道先生曰一命之士苟存心於愛物於人必有所濟



劉安禮問臨民明道先生曰使民各得輸其情  
問御史曰正己以格物

童蒙訓曰當官之法唯有三事曰清曰慎曰勤  
知此三者知所以持身矣

○當官者必以暴怒爲戒事有不可當詳處之  
必無不中若先暴怒只能自害豈能害人

○事君如事親事官長如事兄與同僚如家人  
待羣吏如奴僕愛百姓如妻子處官事如家事  
然後能盡吾之心如有毫末不至皆吾心有所  
未盡也



或問簿佐令者也簿所欲爲令或不從奈何伊  
川先生曰當以誠意動之今令與簿不和便是  
爭私意令是邑之長若能以事父兄之道事之  
過則歸己善則唯恐不歸於令積此誠意豈有  
不動得人

枹朴子曰迎斧鉞而正諫據鼎鑊而盡言此謂  
忠臣也

治家篇

太公曰癡人畏婦賢女敬夫

○凡使奴僕先念飢寒



○子孝雙親樂家和萬事成

○時時防火發夜夜備賊來

文仲子曰婚嫁而論財夷虜之道也

司馬溫公曰凡諸幼卑事無大小毋得專行必咨稟於家長

○待客不得不豐治家不得不儉

景行錄云觀朝夕之早晏可以卜人家之興替

### 安義篇

顏氏家訓曰夫有人民而後有夫婦有夫婦而後有父子有父子而後有兄弟一家之親此三



者而已矣自茲以往至于九族皆本於三親焉  
故於人倫爲重也不可篤

莊子曰兄弟爲手足妻子爲衣服衣服破時更  
得新手足斷時難可續

蘓東坡云富不親兮貧不疎此是人間大丈夫  
富則進兮貧則退此是人間真小輩

### 遵禮篇

子曰居家有禮故長幼辨閨門有禮故三族和  
朝廷有禮故官爵序田獵有禮故戎事閒軍旅  
有禮故武功成



子曰君子有勇而無禮爲亂小人有勇而無禮爲盜

子曰出門如見大賓使民如承大祭

曾子曰朝廷莫如爵鄉黨莫如齒輔世長民莫如德

少儀曰執虛如執盈八虛如有人

○若要人重我無過我重人

○父不言子之德子不言父之過

言語篇

劉會曰言不中理不如不言



○一言不中千語無用

君平曰口舌者禍患之門滅身之斧也

○利人之言煖如綿絲傷人之語利如荊棘一言利人重直千金一語傷人痛如刀割

○口是傷人斧言是割舌刀閉口深藏舌安身處處牢

○逢人且說三分話未可全拋一片心不怕虎生三箇口只恐人懷兩樣心

○酒逢知己千鍾少話不投機一句多

交友篇



子曰與善人居如入芝蘭之室久而不聞其香  
卽與之化矣與不善人居如入鮑魚之肆久而  
不聞其臭亦與之化矣丹之所藏者赤漆之所  
藏者黑是以君子必慎其所與處者焉  
子曰晏平仲善與人交久而敬之

○相識滿天下知心能幾人

○酒食兄弟千箇有急難之朋一箇無

○不結子花休要種無義之朋不可交

○君子之交淡如水小人之交甘如醴

○路遙知馬力日久見人心



家語云與好學人同行如霧中行雖不濕衣時  
時有潤與無識人同行如廁中坐雖不污衣時  
時聞臭

婦行篇

太公曰婦人之禮語必細

○賢婦令夫貴佞婦令夫賤

○家有賢妻夫不遭橫禍

○賢婦和六親佞婦破六親

益智書云女有四德之譽一曰婦德二曰婦言  
三曰婦容四曰婦工也婦德者不必才名絕異



婦言者不必辯口利詞婦容者不必顏色美麗  
婦工者不必伎巧過人也其婦德者清貞廉節  
守分整齊行止有恥動靜有法此爲婦德也婦  
言者擇詞而說不談非語時然後言人不厭其  
言此爲婦言也婦容者洗浣塵垢衣服鮮潔沐  
浴及時一身無穢此爲婦容也婦工者專勤紡  
織勿好暈酒供俱甘旨以奉賓客此爲婦工也  
此四德者婦人之大德也爲之甚易務在正依  
此而行是爲婦節



明心寶鑑終



跋

去年冬家君自嶺南歸手持明  
心寶鑑一卷其中所載數百餘  
言皆勸善懲惡之說也余再三  
披讀未嘗不拊臂而歎也蓋先  
賢之嘉言格說雜出於傳記者  
何限未有若此之辭約而意備



者也其明心寶鑑之名豈偶然  
哉若使學者賢此善言而興起  
焉急滌其既染之累而濯其未  
垢之污也世之昭明其心者捨  
是書而何以哉若其潛心而玩  
索焉則可使人人咸發其好善  
惡惡之心而未必至小補也故



如是乎言以付其後

嘉靖庚戌三月日德水李珥叔

獻謹跋

國朝尚地閔雖其先世之有德  
業文章事行可以表見于世者  
苟非後繩之代有簪組蟬聯奕  
烏闡賡而揚光焉則率多泯而



不章豈可傷也吾里中有秋姓  
人流落羈孤世業農桑絕不言  
譜系來歷人亦不知為名漁遺  
裔也一日挹笈弓冊子匣以巾  
之謁余而曰是吾嶠南諸宗之  
所裒稗先世家乘譜牒豎邱墓  
碑板記實之序若文而其中別



為一書者曰明心寶鑑寔吾先  
祖露堂所著也弁卷之文有諸  
名公作而顧未有跋文焉敢以  
請謹按其書其目凡十九首言  
繼善順命終之以交友婦行採  
掇古昔傳記之要言格論斷章  
分類辭約意盡總之為勸善懲



惡可與感。應篇福壽書相甲乙。而大學治平之道亦不外是要之。非有道者莫能述也。是書刊行。益久而不書。撰人名氏。卷有瞻傳。栗谷李文成序跋。而亦不言誰人所輯。可異也。豈世代縣邈。書存人亡。遂失其名氏歟。抑



子孫微弱有美而不揚莫之徵  
信耶傳曰誦其書不知其人可  
乎今去露堂六百有餘年而秋  
氏之家乘出焉始知是書之為  
露堂所著而使世之人咸知秋  
氏之為先賢裔孫有流之終於  
不揜有如是矣露堂諱適字慣



中官民部尚書封密城伯謚文  
憲高麗忠烈王時入其官厯行  
懿具載麗史及輿地勝覽文獻  
備考近大宗伯海藏申錫愚撰  
其神道之碑證援甚詳寶鑑序  
李判尹源祚許侍郎傳柳外臺  
疇睦趙都正基升述焉是數君



子皆好古博聞人也其言可信  
余在庸贅為姑書此以美昔賢  
懿蹟之自此大顯而亦以賀秋  
氏諸宗之為園中著族云

聖上即祚之六年己巳端月夏  
至後三日嘉善大夫前行兵曹  
叅判兼同知 經筵春秋館義



禁府事五衛都摠府副摠管靈  
川申佐模謹跋

朱子詩曰祇今垢盡明全見還  
得當年寶鑑者此指心而言也  
蓋心之體本明而鑑亦如心鑑  
以照物心以应物其用一也露  
堂秋公明心寶鑑一篇撫取古



人格語以備鑑戒其目十九其  
言皆切皆所以使心不昧而趨  
於善也庶代質質上無善治下  
無明師程朱諸大儒之書亦未  
大行於東方而能自得於傳記  
反求於日用隨手剗記寓目存  
省如此非等閒記述之比也是



以栗谷李文成公為序為跋叅  
互於庸學天人之說而惟不入  
於公之全書中則此必少時作  
也而其反復嘉歎亦足令人感  
發也竊欲置諸几案以為朝夕  
披玩之資豈書之刊布可以為  
世勸也所引莊列語不如吾書



而去其異而取其同亦擇善之  
道也先儒書如莊子嗜欲深天  
機淺等語徃徃引以為證豈以  
是為害之病也哉心如寶鑑物  
未順應鑑為塵垢所蔽則暗心  
為物欲所誘則昏磨洗為去垢  
之法格致為窒欲之方因書以



自警反隅而用功何患不為君  
子遂書于卷端以俟知言者擇  
焉

上之六年己巳夏通政大夫前  
行戶曹參議真城李彙載跋

靖節先生嘗曰言合訓典行合  
世範義可尊事可法遺文不朽



揚名千載信哉言也今玄我  
先祖文憲公露堂先生五百有  
四十餘歲世遠言湮莫能窺其  
蘊奧獨賴此篇之尚存故憑信  
矜式久愈深高凡此十九篇片  
言隻字無非正修齊治之提綱  
繫維而公之所篤修踐履考



也千載不朽非衆書而何不肖  
世文痛家考之浸微懼懿蹟之  
漸泯反復編秩攷正其訛誤間  
又竊附尊聖訓之義質于凝窩  
而上下焉如每篇首輒引經傳  
者也復受序跋於名卿碩匠謀  
諸剞劂鐫梓而國壽傳先生



之嘉謨異行其將與此終始為  
吾道之指南為後學之標準名  
山石室永垂無窮矣  
二十  
代孫 世文謹書



富守已巳新  
刊匪板子大  
戶仁興餘舍



